

Special pa Dia di Himno y Bandera

Haya sa mas di Juan Enrique Irausquin

Sirbidor di Pueblo, Estadista y Politico

ORANJESTAD (AAN): E articulo aki ta na memoria y contribucion di e Ilustre Arubano Juan Enrique Irausquin, q.e.p.d., Tata di nos Turismo Arubano y Motor di

e Economia Arubano.

Juan Enrique Irausquin a nace na Aruba, dia 3 di december 1904. Despues di Lagere School na Aruba el a bay Curaçona unda el a sigui diferente curso den educa-

cion comercial y tambe den Accounting, Money and Banking. Na edad di 14 ana el a drenta servicio di Hollandsche Bank y den un tempo relativamente cortico a yega te na procuratiehouder.

Impulsa pa un ambicion di superacion, sr. Irausquin na 1929 a tuma retiro for di Hollandsche Bank y a drente servicio di firma John Gerard Eman, cu durante algun tempo tabata haci negoshi bancario.

Na 1936 e compania John Gerard Eman den cooperacion cu Maduro & Curiels Bank NV a dicidi di funda e promer banco Arubano, esta Aruba Bank N.V., Juancho, manera popularmente tabata worde yama, a bira su Director. Posicion cu el a ocupa te na ana 1951. Sr Irausquin tabata activo riba hopi tereno. E tabata presidente di Camara di Comercio, di Comision di Turismo, y miembro di hopi comision economico, cofundador di Rotary Club y Aruba Home foundation na Aruba.

Na 1947 el a bira Miembro di Staten y despues a sali reelegi den tur eleccion na cual el a tuma parti. Varios biaha el a worde nombra Presidente di Staten den reconocimiento pa su capacidanan parlamentario. For di ana 1948 Juancho a Participa na tur conferencia importante tocante autonomia pa Antillas Neerlandes, manera Ronde Tafel Conferentie y e asina yama Kleine Commissie.

Na 1949 Juan Enrique Irausquin a funda Partido Patriotico Arubano (P.P.A). Den e promer eleccion pa Eilandsraad na Aruba, Juancho a sali elegi kedando miembro di e raad aki pa varios ana. Su Partido a keda den oposicion te na ana 1954. Dia 1 di april 1956 Juan Enrique Irausquin a worde nombra Ministro di Finanzas y Fomento, puesto importante cu el a keda ocupa te na su morto riba 20 di juni 1962.

Juancho tabata casa cu Maria Waitzberg. Den reconocimiento pa su hopi meritonan riba tereno politico,

economico y social, Su Mahestad La Reina Juliana a haya bon di nombre Officier den Orde di Oranje Nasau.

Aruba y Antillas Neerlandes en general a honra memoria di e ilustre Arubano inaugurando un estatua riba e pleintji dilanti Postkantoor y honrando e cu su nomber "Juan Enrique Irausquinplein" Gobierno di Aruba a duna e caya cual el a construi y tabata e infraestructura necesario pa e construccion di Hotelnan su nomber na 1992.

Vliegvelld di Saba y un caya riba St. Maarten tambe ta carga su nomber como reconocimiento di su contribucion na nan desaroyo y progreso. Servicio Postal di Aruba riba 1 di januari 1996 a sa di honra su memoria cu un stampia special na balor di 100 cent.

En conexion cu nos celebracion di nos dia Nacional di Himno y Bandera dia 18 di maart 2000, Partido PPA ta sintiele como nos deber sagrado y un obligacion di su dirigentenan pa dedica algun palabra di reflexion na e gran figura Arubano fundador di PPA y motor tras di economia Antillano y Arubano.

Nos directiva kier accentua cu e motibonan di Juan E. Irausquin q.e.p.d. pa funda PPA tabata hustamente e principionan sagrado di un Arubano cu ta stima su isla y no a desea pa esaki bay mas profundo den colonialismo cu ya caba e tabata meti.

Historia ta dicta cu na momento cu tabata tin cu kier a humilia Aruba, cu caracter el a sali na defensa di su isla y a propina nan un golpi. Su nomber, labor, actitud, caracter, su sentimentonan pa problemanan di e ser humano den comunidad, tur esaki y mucho mas e hibe den tur skina di Aruba.